


Aðalfundur Pírata
11. – 12. júní 2016
Rúgbrauðsgerðinni – Borgartúni 6, 105 Reykjavík



Fundargögn

Efnisyfirlit

1 Dagskrá fundar	3
2 Skilgreining á starfssviði framkvæmda- og kosningastjóra.....	4
3 Skýrsla framkvæmdaráðs	6
4 Lagabreytingatillögur.....	11

Dagskrá aðalfundar

Fundarstjóri: Sigríður Bylgja Sigurjónsdóttir, framkvæmdastjóri Pírata
Veitingar verða í boði báða dagana

Laugardagur 11. júní 2016

11:00 Húsið opnar. Afhending á nafnspjöldum og gögnum.

12:00 Fundur settur

12:10 – 13:00 Pírataskóli: Fyrirlestur Henry Alexanders Henrysonar, heimspekings

13:05 – 13:20 Ásta Guðrún Helgadóttir þingkona segir frá reynslu sinni af Alþingi

13:20 – 13:45 Hlé

13:45 – 14:15 Kynning á framkvæmdastjóra og kosningastjóra Pírata

14:20 – 14:45 Stefnumálahópur Pírata

14:50 – 16:00 Kynning á grasrót Pírata

16:00 – 16:30 Hlé

16:30 – 16:45: Birgitta Jónsdóttir þingkona

16:50 – 17:20 Framkvæmdaráð fer yfir árið (skýrsla stjórnar / fjármál)

17:25 – 17:50: Halldór Auðar segir frá áföngum Pírata í borginni

17:55 Fundi slitið

20:00 Pírata„PARTÝIÐ“. Píratar ætla að lyfta sér upp. Fljótandi veigar í boði fyrir þá fyrstu og þyrstu. Leynigestur, plötusnúður og góðir vinir!

Sunnudagur 12. júní 2016

11:00 Húsið opnar

12:00 Fundur settur

12:00 – 13:30 Lagabreytingatillögur

13:30 – 13:50 Hlé

13:50 – 14:05 Helgi Hrafn Gunnarsson þingmaður: Gagnrýnin hugsun

14:05 – 15:05 Kynning á frambjóðendum í framkvæmdaráð

15:20 – 15:50 Gengið til kosninga í framkvæmdaráð (hlé)

15:50 – 16:20 Pírataspjallið (Open Mic – Langar þig að tjá þig á aðalfundi, settu nafnið þitt í hatt og þú gætir fengið þrjár mínútur til að tjá þig)

16:20 – 16:35 Kynning á niðurstöðu kosninga til framkvæmdaráðs

16:35 – 16:50 Slembival í framkvæmdaráð

16:50 – 17:00 Hlé

17:05 – 17:55 Kosningar í úrskurðarnefnd og aðrar nefndir

18:00 Fundi slitið

Skilgreining á starfssviði framkvæmdastjóra og kosningastjóra

Framkvæmdaráð hefur gengið frá ráðningu um framkvæmdastjóra og kosningastjóra. Með þessari ályktun viljum við skýra starfssvið og umboð starfsmanna okkar.

Framkvæmdastjóri

Framkvæmdastjóri starfar samkvæmt lögum Pírata.

Framkvæmdastjóri er prókúruhafi í umboði framkvæmdaráðs.

Framkvæmdastjóri starfar fyrir félag Pírata. Framkvæmdastjóri starfar í umboði framkvæmdaráðs. Framkvæmdaráð getur falið framkvæmdastjóra verkefni.

Framkvæmdastjóri leitar umboðs framkvæmdaráðs ef þess gerist þörf fyrir framkvæmd tiltekinna verkefna. Framkvæmdastjóri þarf samþykki framkvæmdaráðs fyrir viðamiklum fjárútlátum.

Framkvæmdastjóri má hafa frumkvæði að því að taka að sér verkefni sem þurfa ekki sérstakt samþykki eða umboð frá framkvæmdaráði.

Helstu verkefni: ábyrgð og umsjón með daglegum rekstri félagsins og húsnæðis, yfirumsjón með starfsmanna- og sjálfbærliðamálum, samskipti við fjölmiðla, verkefnastjórnun á vegum félagsins, skipulagning á vinnuhópum, aðkoma að formlegum samfélagsmiðlum Pírata, samskipti við félagsmenn og önnur tilfallandi verkefni í samráði við framkvæmdaráð.

Gert er ráð fyrir að starfslýsing geti breyst í samráði milli framkvæmdastjóra og framkvæmdaráðs.

Kosningastjóri

Kosningastjóri starfar samkvæmt lögum Pírata

Kosningastjóri starfar fyrir félag Pírata. Kosningastjóri starfar í umboði framkvæmdastjóra og í samstarfi við framkvæmdaráð. Kosningastjóri leitar umboðs framkvæmdaráðs/framkvæmdastjóra ef þess gerist þörf fyrir framkvæmd tiltekinna verkefna.

Kosningastjóri þarf samþykki framkvæmdastjóra og framkvæmdaráðs fyrir viðamiklum fjárútlátum.

Kosningastjóri skipuleggur prófkjör í samráði við aðildarfélög.

Kosningastjóri samræmir kosningabaráttu á landsvísu í samráði við framkvæmdaráð sbr. grein 12.2 í lögum Pírata.

Kosningastjóri ber ábyrgð á þátttöku listans í kosningum í samstarfi við efstu fimm á hverjum lista í hverju kjördæmi sbr. grein 12.1 í lögum Pírata. Kosningastjóri hefur yfirumsjón með samskiptum einstaklinga á lista og fjölmiðla.

Ef ágreiningur kemur upp á milli kosningastjóra og aðila á lista skal vísa málinu til trúnaðarráðs sem sér um sáttamiðlun.


Skýrsla framkvæmdaráðs

Starfsárið 2015- 2016

Fráfarandi framkvæmdaráð hóf störf í september 2015. Árið sem leið var mjög viðburðaríkt fyrir Pírata á Íslandi. Fylgi flokksins fór ört vaxandi og skráðum meðlimum Pírata fjölgaði samhliða því. Þegar fráfarandi framkvæmdaráð tók við störfum mældust Píratar með 35,9% fylgi í skoðanakönnunum sem var stórt stökk frá þeim rúmu 10% sem flokkurinn mældist með í byrjun árs 2015. Helsta verkefni fráfarandi framkvæmdaráðs á starfsárinu sem leið var því að mæta þörfum ört vaxandi stjórn málaafis.

Félagsmönnum fjölgaði talsvert á þessum tíma; skráðir meðlimir voru 2026 talsins í september 2015 og eru nú 3241. Meðlimir á Pírata spjallinu voru 7595 í september 2015 og eru nú orðnir 8957. Framkvæmdaráð býður nýja meðlimi og stuðningsmenn Pírata hjartanlega velkomin í hópinn. Því ber að fagna þegar vel gengur og Píratar ættu sannarlega að fagna þeim frábæra árangri sem náðst hefur frá stofnun flokksins!

Fylgi Pírata



Þróun á fylgi Pírata frá nóvember 2012 (heimild: Kjarninn.is)

Starfið í Tortuga og viðburðir um víðan völl

Forveri fráfaraandi framkvæmdaráðs fann Pírötum heimili að Fiskislóð 31 - betur þekkt sem Tortuga. Allt frá opnun hússins í mars 2015 hafa Píratar komið þar saman í ýmsum tilgangi. Fjöldi félagsmanna hafa komið að viðburðum í Tortuga í samstarfi við framkvæmdaráð og meðal annars haldið þar málþing, reglulega nýliðafundi, fjölskylduskemmtanir, Píratapartý, félagsfundi og málefnafundir. Eins hefur Tortuga verið fundarstaður fyrir reglulega fundi framkvæmdaráðs og annara nefnda og ráða innan flokksins. Tortuga er vinsæll fundarstaður Pírata en nánast öll kvöld voru bókuð í vetur fyrir ýmis konar fundi og spjall.

Meðal málþinga sem haldin voru:

Málþing um landbúnaðarstefnu
Málþing um staðsetningu nýs Landspítala
Málþing um endurhæfingu
Málþing um geðheilbrigðismál (haldinn á Grand Hótel)
Málþing um Reykjavíkflugvöll
Málþing um myglusveppi

Þá var haldinn stefnumálafundur á Grand Hótel í febrúar, þar sem farið var yfir stefnur Pírata og hvernig mætti bæta þær og auka.

Helstu verkefni framkvæmdaráðs á árinu

Eitt af markmiðum fráfaraandi framkvæmdaráðs var að efla starf Pírata á landsbyggðinni. Það hefur gengið mjög vel og eru nú starfandi félög í öllum landshlutum. Þau félög sem voru samþykkt á starfsárinu eru Píratar á Seltjarnarnesi, Píratar á Suðvesturlandi, Píratar á Vesturlandi, Píratar á Vestfjörðum, Píratar á Norðausturlandi, Píratar á Austurlandi og Píratar á Suðurlandi. Framkvæmdaráði er sönn ánægja að bjóða þennan fjölbreytta og frábæra hóp velkominn til starfa í Pírötum!

Áhugi á stefnumótunar- og félagsstarfi Pírata hefur aukist talsvert á árinu. Framkvæmdaráð hefur unnið að því að auðvelda og efla þáttöku félagsmanna í stefnumótun flokksins og öðru félagsstarfi. Starfið fólst meðal annars í því að aðstoða nýja félagsmenn við að koma sér inn í starfið og veita leiðsögn um stefnumótun innan flokksins. Skipulagsverkefni tengd þessu hafa falið í sér að finna fólk til að sjá um fundarstjórn og ritun, passa upp á að aðgangur sé að húsnaðinu og sjá um að streymi sé til staðar.

Önnur verkefni sem framkvæmdaráð skilaði af sér þennan veturinn var að fá símsvörunarþjónustu í gagnið. Sá mikli áfangi hefur því náðst að nú er hægt að hringja í Pírata! Þá var ákveðið að skrá merki Pírata sem félagamerki. Skráningin felur ekki í sér takmarkanir á notkun merkisins en því fylgja nú ákveðnir skilmálar, til dæmis að nota merkið ekki í annarlegum tilgangi.

Formlegir vinnuhópar og ráð skipuð á starfsárinu

Meðal fyrstu verkefna framkvæmdaráðs var að skipa í nýstofnað trúnaðarráð. Fallist var á tiltekið ferli við skipunina. Kallað var eftir tilnefningum frá félagsmönnum. Þeir þrír einstaklingar sem hlutu flestar tilnefningar voru skipaðir í ráðið. Það voru Þröstur Jónasson, Elsa Nore og Finnur Gunnþórsson. Finnur ákvað að segja sig frá trúnaðarráði í marsbyrjun og var Bjartur Thorlacius skipaður í hans stað þar sem hann var fjórði í röðinni þegar tilnefnt var.

Í apríl síðastliðnum var innanhúsnefnd samþykkt sem formlegur vinnuhópur innan Pírata. Nefndin hefur umsjón með útliti, stíl, hreinlætismálum og eftirliti með almennum rekstri Tortuga í umboði framkvæmdaráðs. Jónas Ingólfur Lövdal átti frumkvæði að stofnun nefndarinnar. Hann sannfærði framkvæmdaráð um nauðsyn slíks hóps með þeim orðum að Tortuga liti út eins og “kaffistofa í álveri” og að umbóta væri þörf til þess að gera Pírataheimilið huggulegan stað til þess að vera á. Starf nefndarinnar hefur gengið vel - tekið hefur verið í gagnið fundarherbergi á annarri hæð - auk þess að uppröðun á þungum húsgögnum er nú til fyrirmyndar. Eins er baðherbergi Tortuga hætt að líta út eins og klósett á Hlemmi. Með fullri virðingu fyrir Hlemmi. Framkvæmdaráð kann innanhúsnefndinni góðar þakkir fyrir dugnaðinn.

Í maí var Fjölmiðlunarhópur Pírata samþykktur sem formlegur vinnuhópur innan Pírata. Hópurinn hefur þó löngum verið starfandi innan flokksins og varð mjög virkur á árinu sem leið. Framkvæmdaráð þakkar meðlimum hópsins innilega fyrir vel unnin störf.

Loks ber að geta stofnun aðildarfélagsins Píratar 60+ en félagsmaðurinn Grímur Friðgeirsson átti frumkvæðið að stofnun félagsins. Aðildarfélagið hefur ekki verið formlega samþykkt af framkvæmdaráði þar sem stjórn félagsins er ekki fullmönnuð sem stendur. Framkvæmdaráð fagnar stofnun Píratar 60+ og hvetur félagsmenn til þess að taka þátt í stjórn félagsins.

Starfsmannamál Pírata

Eitt af stærstu verkefnum framkvæmdaráðs þennan veturinn var að ráða starfsfólk. Allt frá stofnun flokksins hefur mest allt starf Pírata verið unnið í

sjálfböðastarfi. Þetta fyrirkomulag hefur gengið ágætlega hingað til enda á flokkurinn öfluga grasrót sem lyft hefur grettistaki undanfarin ár.

Skiptar skoðanir voru um ráðningu starfsmanna vegna fjárhags félagsins. Stóraukið fylgi flokksins og fjölgun félagsmanna er þess þó valdandi að verkefni sem vinna þarf eru viðameiri og þarfnast skipulagningar og viðbragðsgetu sem best henta launuðu starfsfólki. Framkvæmdaráð auglýsti því eftir framkvæmdastjóra Pírata í mars síðastliðnum. Þegar fyrir lá að þingkosningar yrðu í haust varð framkvæmdaráði ljóst að nauðsynlegt væri að ráða starfsfólk sem fyrst.

Framkvæmdaráði bárust tugi umsókna um stöðu framkvæmdastjóra. Sérstakur starfshópur framkvæmdaráðs tók viðtöl við hæfustu umsækjendur og kynnti niðurstöður þeirra fyrir framkvæmdaráði. Á fullsetnum fundi framkvæmdaráðs þann 12. maí samþykktu allir aðal- og varamenn fráfari framkvæmdaráðs að ráða skyldi Sigríði Bylgju Sigurjónsdóttur sem framkvæmdastjóra flokksins. Framkvæmdaráð óskar Sigríði Bylgju innilega til hamingju með starfið og þakkar fyrir stutt en ánægjulegt samstarf frá því að hún hóf störf, þann 17. maí síðastliðinn.

Eitt af fyrstu verkum nýs framkvæmdastjóra var að ráða kosningarstjóra Pírata fyrir yfirvofandi þingkosningar. Jóhann Kristjánsson hafði ásamt Sigríði Bylgju sótt um stöðu framkvæmdastjóra flokksins. Þar sem Jóhann hefur reynslu af kosningastjórnun taldi framkvæmdaráð að Bylgja og Jóhann gætu myndað gott teymi. Framkvæmdaráð ákvað því að leggja fyrir Bylgju að ráða Jóhann sem kosningastjóra. Þeim leist báðum vel á það fyrirkomulag og var gengið frá samningum við Jóhann 1. júní síðastliðinn. Fráfari framkvæmdaráð býður Jóhann hjartanlega velkominn til starfa fyrir Pírata.

Þá er framkvæmdaráði ánægja að tilkynna að Sigríður Bylgja réði forritarann Bjarna Rúnar Einarsson til starfa fyrir flokkinn í góðu samstarfi við framkvæmdaráð. Bjarni Rúnar er einn af upphafsmönnum Pírata á Íslandi og fyrirtaks forritari. Helsta verkefni Bjarna Rúnar verður að uppfæra og halda utan um kosningakerfi Pírata á næstu misserum. Við bjóðum Bjarna Rúnar einnig hjartanlega velkominn til starfa fyrir flokkinn.

Lokaorð

Starf framkvæmdaráðs hefur verið krefjandi og skemmtilegt og meðlimir ráðsins láta af störfum reynslunni ríkari. Við hlökkum til að hitta næsta framkvæmdaráð og munum eflaust vera þeim innan handar á meðan þau fóta sig í nýju hlutverki. Framkvæmdaráð sinnir mikilvægu starfi innan flokksins og ljóst er að verðandi

framkvæmdaráð mun þurfa að takast á við mjög krefjandi verkefni á næstu misserum. Því er mikið fagnaðarefni að sjá þann mikla áhuga sem félagsmenn hafa sýnt þátttöku í framkvæmdaráði.

Starf framkvæmdaráðs væri ómögulegt án öflugs liðsauka félagsmanna. Fráfarandi framkvæmdaráð vill því þakka öllum þeim öflugum Pírötum sem störfuðu með ráðinu á árinu. Án ykkar værum við ekki sá stöndugi og öflugir flokkur sem Píratar eru svo sannarlega í dag.

Takk fyrir okkur, takk fyrir allan fiskinn og síðast en ekki síst: YARRR!

Með Píratakveðju frá framkvæmdaráði Pírata 2015-2016

Bergþór Heimir Þórðarson
Birgir Steinarsson
Björn Þór Jóhannesson
Friðfinnur Finnbjörnsson
Gunnar Ingiberg Guðmundsson
Halldóra Sigrún Ásgeirsdóttir
Herbert Snorrason
Kári Gunnarsson
Sara Oskarsson
Sigmundur Þórir Jónsson
Olga Margrét Cilia
Unnar Örn Ólafsson
Þórhildur Sunna Ævarsdóttir

Lagabreytingatillögur

1. BREYTING Á TALNINGARAÐFERÐ FYRIR KOSNINGU TIL FRAMKVÆMDARÁÐS. GREIN 7.4.

GREIN 7.4 BREYTIST OG VERÐUR EFTIRFARANDI:

7.4. Fimm meðlimir framkvæmdaráðs eru kjörnir í kosningu á aðalfundi, og fimm til vara. Atkvæði og niðurstöður eru talin með Schulze talningaraðferðinni.

ATHUGASEMDIR:

Talningaraðferðin er útskýrð

hér: https://en.wikipedia.org/wiki/Schulze_method. Þessi aðferð hefur verið notuð við val á meðlimum undanfarinna þriggja framkvæmdaráða með samþykki aðalfundar. Það liggur skýrast fyrir að breyta einfaldlega lögunum í takt við notkun.

2. UPPLÝSINGARÁÐ SKILGREINT (NÝTT). GREIN 6.9 OG NÝR KAFLI

LAGT ER TIL AÐ LÖGUM 6.9. VERÐI BREYTT Á EFTIRFARANDI MÁTA:

6.9. Sé þörf á skjótri ákvarðanatöku má leggja til, með samþykki framkvæmdaráðs, hraðmeðferð á tillögu, en hún stendur þá yfir í sólarhring. Slíka ákvörðun þarf að staðfesta með hefðbundnum kosningum sem fara af stað samtímis. Skulu sérstök boð vera send til félagsmanna um að slík tillaga sé til kosningar. Staðfesti upplýsingaráð, með auknum meirihluta (sbr. 9.5), að setja yfirlýsingu í skyndikosningu í samræmi við grein 9.16 má setja slíka kosningu í gang án samþykktar framkvæmdaráðs. Sú heimild gildir eingöngu um tilkynningar eða yfirlýsingar sem þarfnast samþykkis félagsmanna, en veitir ekki heimild til skyndikosninga um stefnumál eða lög félagsins.

LAGT ER TIL AÐ LÖG UM UPPLÝSINGARÁÐ PÍRATA VERÐI SAMÞYKKT SEM LÖG 9.1-9.19

LAGT ER TIL AÐ LÖGUM 9-15 VERÐI BREYTT TIL SAMRÆMIS SVO ÞAU VERÐI LÖG 10-16

9.1. Hlutverk upplýsingaráðs er að veita upplýsingar fyrir hönd Pírata á Íslandi. Upplýsingaráð hefur heimild til þess að tjá afstöðu flokksins í heild til einstakra mála í samræmi við samþykktar stefnur, lög félagsins og ályktanir, hvort sem er að fyrra bragði eða sem svar við fyrirspurnum eða opinberri umræðu sem myndast hefur.

Upplýsingaráð á að sjá til þess að réttar upplýsingar um stefnu pírata og afstöðu þeirra til einstakra mála sé komið á framfæri. Upplýsingaráð hefur umboð til að álykta og senda út yfirlýsingar í nafni flokksins, svo lengi sem slíkar ályktanir eða yfirlýsingar séu í samræmi við samþykktar stefnur, ályktanir og lög félagsins.

9.2. Í upplýsingaráði sitja níu manns og níu til vara. Svæðisfélög í hverju kjördæmi skipa saman einn fulltrúa fyrir kjördæmið og varamann. Þingflokkurinn tilnefnir einn fulltrúa og einn varamann. Aðalfundur kýs að lokum tvo fulltrúa í upplýsingaráð og tvo varamenn með Schulze aðferðinni.

9.3. Sigurvegari kosningar á aðalfundi verður formaður upplýsingaráðs, en sá sem næstur kemur verður varaformaður. Varamenn þeirra eru þeir tveir sem á eftir fylgja.

9.4. Að auki skipa framkvæmdaráð og fjölmiðlunarnefnd áheyrnarfulltrúa í upplýsingaráð. Það val getur sætt endurskoðun og mega framkvæmdaráð og fjölmiðlunarnefnd velja nýja fulltrúa eftir þörfum. Því þarf ekki að skipa sérstaka varamenn. Slíkir áheyrnarfulltrúar sitja fund áfram þó svo ákveðið sé að loka fundi í samræmi við grein 9.18

9.5. Upplýsingaráð tekur ákvarðanir með einföldum meirihluta atkvæða sitjandi aðalmannta nema annað sé tekið fram. Þar sem það kemur fram telst aukinn

meirihluti vera atkvæði amk. þriggja af hverjum fjórum sitjandi aðalmanna, námundað upp. Þannig þarf sjö aðalmenn til að ná auknum meirihluta á fundi þar sem níu aðalmenn eru á staðnum. Kosningarétt á fundum upplýsingaráðs hafa allir viðstaddir aðalmenn eða varamenn þeirra í samræmi við lið 9.11. Viðstaddir teljast þeir sem eru staddir á fundinum, eða taka þátt í gegnum fjarfundarbúnað.

9.6. Þingflokkur og svæðisfélög ákveða sjálf hvernig þau velja fulltrúa og varafulltrúa þingflokksins eða kjördæmisins í upplýsingaráð. Hafi kjördæmi eða þingflokkur ekki valið sér fulltrúa og varamann mánuði eftir aðalfund Pírata og sitji ekki fulltrúi með gilt umboð frá fyrra tímabili í samræmi við grein 9.9 skal framkvæmdaráð skipa staðgengla þeirra sem skuli sitja þar til kjördæmið eða þingflokkurinn velur fulltrúa. Þessir fulltrúar og staðgenglar hafa upplýsingaskyldu við það félag sem þeir sitja fyrir, en skal útfærsla hennar ákveðin af þeim hópum.

9.7. Upplýsingaráð velur sér sjálft ritara og önnur embætti sem það telur sig þurfa, utan formanns og varaformanns.

9.8. Upplýsingaráð skal setja sér starfsreglur og gera þær opinberar á heimasíðu Pírata.

9.9. Þau félög sem skipa fulltrúa í upplýsingaráð ráða hve oft og hvenær sú skipun er endurskoðuð en skal umboðið endurnýjað eigi sjaldnar en árlega. Þó skal enginn sitja í upplýsingaráði lengur en tvö ár í senn. Seta sem varamaður telur ekki sem seta í upplýsingaráði.

9.10. Upplýsingaráð skal funda að lágmarki mánaðarlega. Alla aðalfulltrúa og varafulltrúa skal boða til fundarins eigi síðar en viku fyrir fund. Fundir upplýsingaráðs skulu vera opnir félagsmönnum nema aukinn meirihluti upplýsingaráðs ákveði að sökum sérstakra aðstæðna skuli fundur eða hluti fundar vera lokaður. Sé það mögulegt skal afgreiða slík mál í upphafi eða undir lok fundar.

9.11. Upplýsingaráðsfundur telst löglegur ef a.m.k. 5 aðalmenn eru viðstaddir eða varamenn þeirra. Varamaður hvers aðalmanns hefur forgang. Varamenn kjörnir á aðalfundi eru næstir og taka sæti fulltrúa sem er fjarverandi á fundi, sé þeirra varamaður heldur ekki á fundinum. Hafi þeir þegar tekið sæti, eða séu ekki til staðar, og þarf enn að manna sæti aðalmanna, mega þeir ráðsmenn sem tekið hafa sæti sjálfir ákveða hver af viðstöddum varamönnum taki þau sæti aðalmanna sem eftir á að fylla með einföldum meirihluta.

9.12. Haldi upplýsingaráð ekki löglegan fund í 60 daga, skal Framkvæmdaráð boða til neyðarfundar upplýsingaráðs. Falli sá fundur niður sökum vanmönunnar, eða sé það niðurstaða fundarins að ráðið sé óstarfhæft, skal formanni gert að víkja. Þá taki varaformaður sæti formanns og næsti varamaður taki sæti í ráðinu. Nýr formaður ber ábyrgð á að gera kjördæmaráðum og þingmönnum grein fyrir stöðu mála og krefjast endurskoðunar á fulltrúum

þeirra. Takist ekki að manna upplýsingaráð á 30 dögum svo það sé starfhæft skal boða til auka-aðalfundar. Gerist það aftur í setu sama upplýsingaráðs að ekki sé haldinn löglegur fundur í 60 daga skal einnig boða til auka-aðalfundar.

9.13. Upplýsingaráð má gefa yfirlýsingar um stefnu flokksins út frá samþykktum stefnumálum, lögum og ályktunum. Í slíkri yfirlýsingu má túlka stefnu ef þarf til að svara fyrirspurnum en þó skal gæta meðalhófs. Liggi skýr stefna ekki fyrir skal miða við grunnstefnu pírata, en þó með þeim fyrirvara að ekki sé til samþykkt stefna í þeim málaflokki. Þetta gildir þó einungis um þau mál þar sem augljóst ætti að vera hver afstaða félagsmanna sé, eða augljós skírskotun í samþykktar stefnur eða grunnstefnu. Sé slík yfirlýsing gefin út skal hún undirrituð af öllum aðalmönnum upplýsingaráðs sem sitja fundinn, eða varamönnum þeirra í samræmi við grein 9.11.

9.14 Upplýsingaráð má velja sér talsmann eða talsmenn ákveðinna samþykktra stefnumála og skal það umboð veitt með auknum meirihluta ráðsmanna. Slíkir talsmenn skulu gera ráðinu grein fyrir viðbrögðum sínum hverju sinni. Það skal gert óformlega jafnóðum en í síðasta lagi á næsta formlega fundi upplýsingaráðs. Einfaldur meirihluti upplýsingaráðs dugir til að afturkalla slíkt umboð.

9.15. Séu að minnsta kosti þrír aðalmenn sammála um að komið hafi upp mikilvægt málefni sem krefjist tafarlausrar meðferðar ráðsins skal formaður boða til aukafundar. Á þann fund þarf að boða alla aðalmenn og varamenn, en það má vera með skemmri fyrirvara en viku. Ákvarðanir þess fundar teljast þó ekki gildar nema þær hljóti aukinn meirihluta.

9.16. Komi upp mál þar sem brýnt þykir að skýra afstöðu flokksins í mikilvægu málefni, þar sem ekki liggur fyrir skýr stefna, hefur upplýsingaráð heimild til að búa til yfirlýsingu og setja í neyðarkosningu í kosningakerfi Pírata í samræmi við grein 6.9. Sú kosning skal standa í 24 tíma. Má svo gefa hana út í nafni flokksins hljóti hún einfaldan meirihlutastuðning. Slík yfirlýsing fellur úr gildi þegar gild stefna í málaflokknum hefur verið samþykkt. Upplýsingaráð getur samþykkt að setja í gang slíka kosningu með auknum meirihluta.

9.17 Takist upplýsingaráði ekki að koma sér saman um úrræði í mikilvægu máli samkvæmt grein 9.13 eða 9.16 er því skylt að gefa yfirlýsingu þess efnis að það óski eftir að það mál fari í stefnumótunarferli innan flokksins. Ráðið skal koma því á framfæri við þá hópa innan flokksins sem málefnið varðar, svo sem aðildarfélög, málefnaþópa, framkvæmdaráð eða grasrót, með auglýsingu á vefsvæði pírata og öðrum viðeigandi hætti, svo sem með tölvupósti, boðun félagsfundar eða með auglýsingu á netmiðlum eftir því sem við á.

9.18. Halda skal fundargerð fyrir hvern fund upplýsingaráðs og skal hún birt á vefsvæði pírata eigi síðar en tveimur vikum eftir fund. Það er á ábyrgð ritara. Hafi upplýsingaráð ákveðið að fundur skuli vera lokaður þarf samt að halda fundargerð, en má hún vera lokuð. Úrskurðarnefnd eða trúnaðarráði er heimilt að fara fram á rökstuðning þess að fundur sé lokaður og geta ákveðið að

fundargerð skuli opnuð, sé sú röksemd metin ófullnægjandi. Eins er úrskurðarnefnd eða trúnaðarráði heimilt að fá aðgang að lokuðum fundargerðum án þess að opna þær, séu þær viðkomandi málefni sem þau hafi til afgreiðslu.

9.19. Víki aðalmaður í upplýsingaráði sæti, hvort sem er varanlega eða tímabundið, skal varamaður hans taka við af honum á meðan fjarveru stendur. Sá fulltrúi teljist þá aðalmaður með þeim réttindum og skyldum sem því fylgja. Sé varamaður ekki til staðar skal fylla sæti hans í samræmi við grein 9.11. Víki aðalmaður sem er fulltrúi þingflokks eða kjördæmis varanlega sæti og sé réttur varamaður ekki tiltækur skal þingflokkurinn eða kjördæmið þá velja sér nýjan fulltrúa í upplýsingaráð, en manna má stöðuna á fundum í samræmi við grein 9.11 þangað til það er gert. Varamaður telst eingöngu sitjandi fulltrúi í skilningi laga þessara á meðan hann hefur réttindi og skyldur aðalfulltrúa.

GREINARGERÐ:

Þessi lög eru tilkomin af því að ljóst er að óvissa er uppi um það hvernig megi halda stefnu pírata til haga með skýrum hætti, svo fjölmiðlar, kjósendur og aðrir viti hvert sé hægt að leita til að fá skýr svör. Þeir sem gefi þau svör þurfa að hafa umboð til að svara slíkum spurningum í nafni félagsins, en þó þarf að setja slíku umboði skýr mörk.

Tilgangur upplýsingaráðs er að svara spurningum, leiðrétta rangfærslur og halda til haga hver afstaða Pírata sé. En ráðið á ekki að ákveða sjálft hver sú stefna sé, liggi hún ekki fyrir. Skýr krafa er að þeir sem gegni þessum embættum forðist að lýsa eigin skoðun þegar þeir tala í umboði sínu sem meðlimir upplýsingaráðs.

Ákveðið var að best færi að lög um upplýsingaráð fylgi beint á eftir lögum um framkvæmdaráð, úrskurðarnefnd og trúnaðarráð og því er lagt til að þau verði gerð lög 9. Núverandi lögum 9 til 15 verði þá breytt til samræmis svo þau verði lög 10 til 16.

Breyta þarf lögum 6.9 til að þau leyfi úrræði sem upplýsingaráði er veitt í grein 9.16 or er sú breyting tekin með í þessari tillögu.

9.1.

Hér er útlistað hvert sé hlutverk upplýsingaráðs. Það má gefa út yfirlýsingar og ályktanir í samræmi við þá stefnu sem Píratar hafa samþykkt, ályktanir þeirra og lög og að sjálfsögðu grunnstefnu, sem telst hluti af samþykktum stefnum í þessu samhengi. Ráðið má útskýra stefnu, leiðrétta rangfærslur og svara spurningum, en ekki semja stefnu eða ákveða hana sjálft.

9.2.

Hér er útlistað hverjir hafi aðkomu að upplýsingaráði. Þessi útfærsla snýst um það að efla aðkomu sem flestra Pírata að ráðinu og leyfa þeim að upplifa að allir eigi þar rödd. Þó er mikilvægt að láta líka meirihluta félagsmanna hafa visst

vægi, en við teljum að góður meðalvegur sé fundinn með því að kjördæmi skipi sinn fulltrúa hvert, en aðalfundur skipi tvo og þingflokkur einn. Schulze aðferðin er valin til að samræma innri kosningar Pírata, umfram Eitt flytjanlegt atkvæði (STV) aðferðina, en þó myndu báðar duga ágætlega. Teljum við að hún muni skila vel þeim tveimur aðalmönnum og tveimur varamönnum sem mestan stuðning hafi, án þess að félagsmenn þurfi að kjósa taktískt eða velja illskásta kost að eigin mati. Tekið skal fram að fulltrúi þingflokks þarf ekki sjálf(ur) að vera þingmaður eða varaþingmaður (þó hann eða hún megi vera það) heldur einungis einhver sem þingflokkur treystir til starfsins.

9.3.

Þetta ákvæði skýrir sig í raun sjálft, þarna er tiltekið að kosning á aðalfundi kjósi formann og varaformann upplýsingaráðs. Þeirra varamenn séu svo (í rétttri röð) þeir sem lenda í sæti þrjú og fjögur.

9.4.

Framkvæmdaráð og fjölmiðlunarnefnd eru mikilvægir hlutar af innra starfi Pírata. Þeirra sjónarmið og áherslur geta skipt miklu máli þegar upplýsingaráð tekur ákvarðanir, og geta líka skipt máli þegar kemur að því að eiga samráð við framkvæmdaráð og fjölmiðlunarnefnd. Þó var álitnið að betur færi að um áheyrnarfulltrúa væri að ræða en aðalmenn, þar eð ekki var talið gott að kjörið embætti leiddi einnig af sér ábyrgðarstöðu til jafns við annað kjörið embætti. Þó var gerð undantekning með þingflokkinn, þar sem sá hópur er kjörinn af landsmönnum öllum. Taka skal fram að áheyrnarfulltrúi þarf ekki að vera hluti af framkvæmdaráði eða fjölmiðlunarnefnd, þó það megi.

9.5.

Í þessu ákvæði er útskýrt hvernig ákvarðanir upplýsingaráðs séu teknar. Venjulegar ákvarðanir þurfa einfaldan meirihluta þeirra aðalmanna sem sitja fundinn, en aukinn meirihluti er skilgreindur þannig að þrír fjórðu aðalmanna þurfi að samþykkja. Það eru þá 4 ef 5 sitja fundinn, 5 ef 6 sitja fundinn, 6 ef 7 eða 8 sitja fundinn og 7 ef 9 sitja fundinn.

Það er gert til að árétta að þau úrræði sem bundin eru auknum meirihluta ættu að vera þess eðlis að svo að segja allir séu sammála þeim, en gefur þó svigrúm til að einhver geti setið hjá, vilji þau frekar halda að sér höndum eða hafi sér-túlkun sem þau vilji halda til haga.

9.6

Þessu ákvæði er ætlað að árétta það að fulltrúar kjördæmanna og þingflokksins eigi að vera skipaðir af þeim og það sé ekki endilega hlutverk þessara laga að ákveða hvernig það sé gert. Svæðisfélög í hverju kjördæmi þurfi að koma sér saman um hvernig skuli velja, en tiltekið er úrræði takist það ekki. Þurfi Framkvæmdaráð að velja staðgengill er vonast til að þá yrði valinn staðgengill sem hefur tengsl við og þekkingu á því svæði eða þeim hóp sem hann er staðgengill fyrir. Þarna er líka tiltekin upplýsingaskylda, en hver fulltrúi í

upplýsingaráði ber ábyrgð á því að þau svæðisfélög, þingflokkur eða annað sem hann situr fyrir hafi upplýsingar um hvað upplýsingaráð hefst að og þær ákvarðanir sem eru teknar.

9.7

Hér er það tiltekið að þó svo formaður og varaformaður séu valdir af aðalfundi, þá sé það ráðið sjálft sem velji í önnur embætti eftir þörfum. Eina embættið sem er formlega skilgreint er ritari, en önnur embætti getur það ákveðið sjálft. Þær stöður gætu verið fjölmiðlafulltrúi, alþjóðafulltrúi, gjaldkeri, fulltrúi tiltekins stefnumáls eða ýmislegt fleira.

9.8.

Hér er tiltekið að ráðið skuli setja sér starfsreglur, sem það skuli fara eftir og gera opinberar á heimasíðu Pírata. Það geta verið reglur um fundarsköp, innra skipulag, ábyrgðarskiptingu innan ráðsins, reglulega fundi eða annað.

9.9.

Hér er það áréttað að félög sem eigi aðild að upplýsingaráði ákveði sjálf hvenær og hve oft þau skipi sína fulltrúa. Sum gætu t.d. viljað skipta um fulltrúa eftir aðalfundi sinna félaga, eða þingflokkur eftir alþingiskosningar. Það sem skiptir máli er að umboð sé endurnýjað a.m.k. árlega, og að enginn sitji lengur en tvö ár.

9.10

Hér er tiltekið að upplýsingaráð eigi að funda að minnsta kosti mánaðarlega. Þó væri yfirleitt ráðlegt að funda töluvert oftari en það. Boðun um fund skal berast með viku fyrirvara, en eins og viðgengst hjá öðrum félögum má líka vera með fastan fundartíma og telst þá vera boðað til hans með viðunandi hætti ef öllum aðal- og varamönnum er gert grein fyrir því a.m.k. viku áður en fyrsti slíki fundur er haldinn. Upplýsingaráð má loka fundi, eða hluta fundar, telji það sig hafa góða ástæðu til og hafi til þess aukinn meirihluta, en leitast skal við að afgreiða slík mál í upphafi eða við lok fundar.

9.11

Hér eru tilgreindar reglur um hvað teljist gildur fundur og hvernig varamenn virka. Varamaður ákveðins aðalmanns hefur alltaf forgang, en varamenn kjörnir á aðalfundi koma næstir og eru þeir almennir varamenn í ráðið ef þess er þörf. Að lokum er þeim aðalmönnum sem tekið hafa sæti leyft að velja hvaða varamenn taki sæti þeirra sem enn á eftir að fylla, séu ekki réttir varamenn, eða almennir varamenn af aðalfundi til taks. Þetta er gert svo sem minnstur vafi leiki á hverjir séu réttir varamenn hverju sinni.

9.12.

Hér er tilgreint hvað gerist, verði upplýsingaráð óvirkt eða óstarfhæft. Þó halda eigi fund mánaðarlega er það ekki fyrr en eftir 60 daga sem viðurlög og formleg viðbrögð taka við. Tilgangurinn með þessu er að passa að virkt upplýsingaráð sé til staðar. Fyrstu viðbrögð eru neyðarfundur, sem er á ábyrgð framkvæmdaráðs, þar eð upplýsingaráð sé sýnilega ekki fært um að boða til fundar. Sá fundur

annað hvort ákveður að um tímabundinn brest hafi verið að ræða og tekur aftur til starfa, eða ákveður að ráðinu sé ekki fært að starfa áfram. Þá skal formaður víkja sæti og varaformaður tekur við. Sá sem var í þriðja sæti á kjöri aðalfundar kemur þá inn sem nýr varaformaður og aðalmaður í ráðið. Nýr varaformaður ber skyldu til að tala við þingflokk og svæðisfélög og fara þess á leit að þau skipi fulltrúa sem sjái sér fært að mæta á fundi. Takist ekki að skipa upplýsingaráð sem er starfhæft á 30 dögum eftir neyðarfund skal boða til auka-aðalfundar. Eins er það tiltekið að gerist þetta aftur skuli boða til auka-aðalfundar, enda sé ekki hægt að eyða tíma félagsins með því að sama ráð samþykki ítrekað á neyðarfundum að sitja áfram.

9.13.

Þetta ákvæði gefur upplýsingaráði heimild til að gefa út yfirlýsingar um stefnu flokksins út frá samþykktum stefnumálum, lögum og ályktunum, eða grunnstefnu séu þær ekki til staðar í þeim málaflokki. Þetta ákvæði er hugsað fyrir þau mál þar sem augljóst ætti að vera hver afstaða flokksins er og engin átök fyrirsjáanleg, enda er þess krafist að allir viðstaddir aðalmenn skrifi upp á slíka yfirlýsingu og er það í raun sambærilegt kröfu um samhljóða ákvörðun.

9.14.

Í stórum málaflokkum þar sem til er skýr stefna má upplýsingaráð velja ákveðinn talsmann, sem hafi þá umboð ráðsins til að fjalla um það út á við án þess að ráðfæra sig við ráðið í hvert skipti. Þeir mega vera fleiri en einn, ef ráðið ákveður það, en ættu þá að hafa samráð svo þeir endi ekki í mótsögn hvor við annan. Talsmenn ættu þó alltaf að gera upplýsingaráði grein fyrir svörum sínum og viðbrögðum, bæði óformlega og í síðasta lagi á næsta formlega fundi upplýsingaráðs. Ef ráðið ákveður að draga slíkt umboð til baka dugir til þess einfaldur meirihluti.

9.15.

Hér er tiltekin heimild til að boða til aukafundar með skemmri fyrirvara en viku. Þá þurfa amk. þrír aðalmenn að vera sammála um að brýnt sé að ráðið komi saman í flýti, og það er þá á ábyrgð formanns að boða til þess fundar alla aðal- og varamenn (hvort sem formaðurinn sjálfur er sammála því mati eður ei). Þegar sá fundur kemur saman þarf alltaf aukinn meirihluti til að ákvarðanir hans séu gildar.

9.16.

Hér er upplýsingaráði heimilt að meta væntanlega afstöðu pírata í tilteknu mikilvægu máli, sem ekki er til gild stefna um, og skrifa yfirlýsingu þess efnis. Mælst er til þess að ef til er vinnuhópur um þá stefnu væri haft samráð við þann hóp eða ábyrgðarmann þegar kemur til þess að skrifa slíka yfirlýsingu, en þó er upplýsingaráði það ekki skylt. Þá yfirlýsingu þarf þó að samþykkja í kosningakerfi Pírata til að hana megi senda út. Í ljósi þess að fyrirséð þykir að þetta ákvæði sé helst nýtt þegar mikið liggur á svörum er bætt við heimild til að

sú kosning sé neyðarkosning sem fram fari á sólarhring, sbr. grein 6.9, en þeirri grein er breytt til samræmis til að það sé leyft. Slík yfirlýsing fellur svo úr gildi þegar gild stefna hefur verið samþykkt í málaflokknum, enda sé hún væntanlega yfirgripsmeiri og ítarlegri. Eins þarf að passa að þeir sem standi að stefnumótun séu ekki bundnir af slíkri yfirlýsingu og geti búið til stefnu sem kemst að annarri niðurstöðu, hljóti hún samþykki. Tiltekið er að aukinn meirihluta þurfi, þar sem þetta er úrræði sem ekki ætti að beita að óþörfu eða í málum þar sem ekki sé töluverður samhugur.

9.17.

Í þeim málum þar sem brýnt þykir að komast að niðurstöðu, en upplýsingaráði er það ekki fært með greinum 9.13 eða 9.16, er augljóst að dýpri stefnuvinnu þarf til. Þá ber upplýsingaráði að gefa út tilkynningu þess efnis að það óski þess við viðeigandi undirfélög, stjórnir eða grasrót, að í gang fari stefnuvinna í málaflokknum. Þá tilkynningu ber að auglýsa með viðeigandi hætti, en þó aldrei minna en með tilkynningu á vefsvæði Pírata.

9.18.

Hér er tilgreind sú skylda upplýsingaráðs að halda fundargerð um hvern fund og birta hana á vefsvæði Pírata, þá væntanlega á undirsíðu upplýsingaráðs, eigi síðar en tveimur vikum eftir fund. Hafi upplýsingaráð ákveðið að fundur eða hluti hans sé lokaður þarf ekki að birta fundargerðina, en hún þarf samt að vera til og mega trúnaðarráð eða úrskurðarnefnd fara fram á rökstuðning þess að fundargerðin sé lokuð og sé sú röksemd ekki metin fullnægjandi geta þau ákveðið að hún skuli opnuð og skal þá upplýsingaráð verða við því. Einnig er úrskurðarnefnd eða trúnaðarráði heimilt að biðja um aðgang að lokaðri fundargerð, séu þar upplýsingar sem skipta máli við úrlausn máls sem þau hafi til afgreiðslu.

9.19

Hér er farið gaumgæfilega í það hvernig skuli standa að því ef aðalmaður segir sig frá ráðinu tímabundið eða varanlega. Hans varamaður tekur við, en sé varamaðurinn ekki tiltækur má manna stöðuna í samræmi við 9.11 þangað til nýr aðalmaður hefur verið valinn. Það skiptir mestu máli þegar kemur að fulltrúa þingflokks eða kjördæmis, en manna má varanlega út frá 9.11 ef um fulltrúa af aðalfundi er að ræða. Eins er áréttað að varamaður teljist eingöngu sitjandi fulltrúi meðan hann hafi réttindi og skyldur aðalfulltrúa.

3. STÝRIMENN SKILGREINDIR (NÝTT). NÝR KAFLI

SÁ TEXTI SEM HÉR FER A EFTIR VERÐI 10.TÖLUSSETTA LAGAGREIN, EÐA KAFLI, LAGA PÍRATA Í STAÐ GR. „10. AÐILDARFÉLÖG“ OG SKAL SÚ GREIN VERÐA „11. AÐILDARFÉLÖG“. TÖLUSSETNINGAR AFTARI GREINA HÆKKI UM 1 HVER.

10 STÝRIMENN

1. Píratar geta á almennum félagsfundum og Aðalfundi munstrað stýrimenn, einn eða fleiri, til að sinna ákveðnum, vel skilgreindum og tímabundnum verkefnum í umboði flokksins.
2. Verkefni stýrimanna, skyldur þeirra til skýrslugjafar og tímamörk verkefnisins skal skilgreint í erindisbréfi sem lagt er fram á Aðalfundi flokksins eða almennum félagsfundi. Tímamörk verkefnis skal þannig vera gildistími erindisbréfs.
3. Tímabinding skipunar skal vera eins þröng og kostur er og aldrei lengra en eitt ár. Hægt er að endurnýja erindisbréf þegar mest einn mánuður er eftir af gildistíma fyrra erindisbréfs. Endurnýjun fer fram eins og um nýtt erindisbréf væri að ræða.
4. Erindisbréf öðlast gildi þegar það hefur verið staðfest af Aðalfundi. Erindisbréf sem lagt er fram á almennum félagsfundi öðlast gildi þegar það hefur verið staðfest með atkvæðagreiðslu í rafrænu atkvæðagreiðslukerfi Pírata og hefur verið staðfest af meirihluta aðalmanna í framkvæmdaráði og meirihluta þingflokks Pírata þegar slíkum flokki er til að dreifa. Erindisbréf frá Aðalfundi má Aðalfundur ákveða að sent verði til staðfestingar eða synjunar í atkvæðagreiðslukerfi flokksins og frestast þá gildistaka uns staðfesting hefur fengist. Ef skipunarbréfi frá Aðalfundi er synjað staðfestingar í atkvæðagreiðslukerfi Pírata skal það ekki öðlast gildi. Ef almennur félagsfundur sendir erindisbréf í atkvæðagreiðslukerfi Pírata skal erindisbréfið vera til umræðu þar í sjö daga og atkvæðagreiðsla skal standa aðra sjö daga.. Sömu tímamörk gilda ef Aðalfundur ákveður að senda erindisbréf í atkvæðagreiðslukerfið.
5. Fjöldi stýrimanna verkefnis skal vera oddatala og skal hver stýrimaður velja sér sinn varamann.
6. Stýrimenn þurfa ekki að vera Píratar en geta verið sérfræðingar á því sviði sem verkefnið krefst eða eftir atvikum aðrir þeir sem sinnt geta verkinu.
7. Séu stýrimenn verkefnis fleiri en einn skal þeirra fyrsta verk vera að skipta með sér verkum og kjósa sér fyrsta stýrimann og einnig annan stýrimannef stýrimenn eru fleiri en einn, úr sínum hópi.

8. Fyrsti stýrimaður skal jafnan stýra fundum hópsins og sinna almennri verkstjórn hópsins en annar stýrimaðurskal rita fundi og taka við verkstjórn í forföllum fyrsta stýrimanns.

9. Almennur félagsfundur og Aðalfundur getur krafist Stýrimenn um skýrslu um stöðu verkefnis og skal henni skilað innan þriggja vikna frá því að hennar er krafist.

GREINARGERÐ

Píratarpartýið leggur megináherslu á beint lýðræði og hefur flokkurinn því flatan skipulagsstrúktur því í flokknum er megináhersla lögð á sjálfsstjórn og að að æðsta vald sé í höndum grasrótarinnar. Þvi hafa Píratar forðast að búa til föst embætti þar sem völd safnast fyrir. Þetta hefur leitt til ákveðinna vandamála sem helgast af umboðsskorti. Mjög illa hefur gengið að ganga verk sem vinna þarf því iðulega er óljóst hvort umboð er til verka og þá hver er handhafi þess umboðs. Þetta hefur leitt til þess að völd og verk hafa haft tilhneigingu til að lenda á framkvæmdaráði flokksins, sam aldrei var ætlað að sinna öðru en almennum reksri félagsins. Þetta hefur enn fremur leitt til þess að upp hafa komið hugmyndir um að hinn flati strúktúr flokksins sé lítt nothæfur í praxis og því þurfi Píratar að mynda innri strúktur sem byggir á stigskiptingu með formönnum, fastanefndum og öðrum valdhöfum. Fyrirsjáanlegt er, að ef Pírötum vex fiskur um hrygg og öðlast aukna lýðræðislega ábyrgð, muni enn rammar kveða að þeim vanda sem hér hefur verið lýst

Í þessari viðbót við lög Pírata er lögð áhersla á að breyta ekki grunnstrúktúr flokksins. Föst, ótimabundin völd sem tengjast ákveðnum föstum embættum verða ekki til því allt umboð stýrimanna er kyrfilega tímabundið og tengt skilgreindum verkefnum. Staða stýrimanna færir Pírötum hins vegar lagalega undirstöðu undir veitingu og meðhöndlun umboðs í mikilvægum verkefnum þarf að vera hafið yfir vafa. Dæmi um verkefni sem fela má stýrimönnum eru myndun ríkisstjórnar, samningar við aðra stjórnmalaflokka, val á ráðherrum og öðrum embættismönnum fyrir flokkinn, samskipti við fjölmiðla við tiltekna aðstæður eða almennt o.s.frv.

4. AÐALFUNDUR ER EINNIG ALMENNUR FÉLAGSFUNDUR. GREIN 4.1.

LAGT ER TIL AÐ UPPHAFI 4 KAFLA LAGANNA VERÐI BREYTT SVO:

4. AÐALFUNDUR

4.1. Aðalfund skal halda á hverju ári, fyrir lok septembermánaðar.

VERÐUR:

4. AÐALFUNDUR

4.1. Aðalfund skal halda á hverju ári, fyrir lok septembermánaðar og telst fundurinn einnig vera almennur félagsfundur.

GREINARGERÐ:

Lagaspekúlantar Pírata vildu í fyrra meina að aðalfundur gæti ekki sent ályktanir og stefnu til atkvæðagreiðslu því það gæti aðeins almennur félagsfundur. Það er frekar óhönduglegt að þurfa að halda sérstakan fund eftir aðalfund til að senda ályktanir Aðalfundar flokksins í rafræna atkvæðagreiðslu. Þessi breyting bætir úr þessum einkennilega ágalla.

5. VALDSVIÐ KJÖRDÆMISRÁÐA

TILLAGA TIL BREYTINGA Á LÖGUM PÍRATA (VALDSVIÐ KJÖRDÆMISRÁÐA)

1. Við fyrstu málsgrein gr. 12.1 bætist eftirfarandi setning: „Ábyrgðaraðila ber að setja skýrar reglur um framboð Pírata.“
2. Við aðra málsgrein gr. 12.1 bætist eftirfarandi setning: „Kjördæmisráð, sé það starfandi, ber alfarið ábyrgð á þátttöku Pírata í kosningum til Alþingis innan kjördæmis síns.“
3. Á eftir gr. 12.5 kemur ný grein, og orðast hún svo:

Ábyrgðaraðila er heimilt að setja frekari reglur um framkvæmd kjörs á framboðslista. Í slíkum reglum er heimilt að kveða á um skilyrði atkvæðisréttar í kosningu á framboðslista.

Félagsmaður, sem getur sýnt fram á að hann muni að óbreyttu hafa kosningarrétt við Alþingiskosningar, skal ætíð hafa atkvæðisrétt í kosningum á framboðslista í kjördæmi sínu. Þó má gera kröfu um að félagsmaður hafi verið skráður um ákveðið tímabil áður en kosning fer fram.

ATHUGASEMDIR

Í gildandi lögum Pírata er kveðið á um að kjördæmisráð skuli starfa ef aðildarfélag innan kjördæma til Alþingiskosninga hafi ekki komið sér saman um annað fyrirkomulag. Ekkert annað er að finna í lögunum um valdsvið ráðanna, en ætlunin var að þau færu alfarið með skipulagningu og framkvæmd á þátttöku flokksins í kosningum, frá kosningum á framboðslista til eftirlits með kosningunum. Með þessari breytingartillögu er þetta tekið fram á mun skýrari hátt. Kjördæmisráð fellur undir regluna um að fundarsköp reglulegra nefnda og ráða skuli vera opinber, en til að það fari ekki milli mála að ætlast sé til þess að framkvæmd framboðsmála sé ákveðin með nokkrum fyrirvara er sérstaklega tekið fram að setja skuli reglur þar að lútandi.

Stærsti liðurinn í þessari breytingu er þriðja greinin. Þar er í fyrsta lagi tekið fram að ábyrgðaraðila sé heimilt að setja frekari reglur um framkvæmd kosningar á framboðslista, en möguleg dæmi um slíkt er t.d. að ákveða með hvaða hætti atkvæði skuli greidd, eða að tiltaka verði lágmarksfjölda frambjóðenda á atkvæðaseðlum. Sérstaklega er tekið fram að meðal þeirra reglna sem heimilt sé að setja séu takmarkanir á atkvæðisrétti í kosningum á framboðslista. Með þeirri breytingu er tekinn af allur vafi um það hvort slíkar takmarkanir standist lög Pírata. Áskilið er þó að atkvæðisréttur í Alþingiskosningum verði ekki skorðaður meira en svo, að skráðir Píratar innan kjördæmis eigi alltaf atkvæðisrétt.

6. TÍMAMÖRK KOSNINGA Á FRAMBOÐSLISTA

TILLAGA TIL BREYTINGA Á LÖGUM PÍRATA (TÍMAMÖRK KOSNINGA Á FRAMBOÐSLISTA)

1. Þriðja málsgrein gr. 12.1 verður sérstök grein, 12.2, og breytist tölusetning síðari greina til samræmis. Við greinina bætist ný setning, og orðast hún í heild svo:

Starfi engin aðildarfélag innan kjördæmis til alþingiskosninga er framkvæmdaráði heimilt að standa fyrir kjöri á lista fyrir það kjördæmi. Einnig skal framkvæmdaráði heimilt að standa fyrir kjöri á lista ef aðildarfélag innan kjördæmis til alþingiskosninga hafa ekki framkvæmt slíkt kjör mánuði áður en framboðsfrestur rennur út. Skulu allir félagsmenn Pírata hafa kosningarétt í kjöri á vegum framkvæmdaráðs. Þeir sem raðast í fimm efstu sæti slíks lista bera ábyrgð á þátttöku hans í kosningum.

2. Á eftir gr. 12.5 kemur ný grein, og orðast hún svo:

Kosið skal á framboðslista innan fjögurra mánaða fyrir kjördag þeirra kosninga sem listinn er til.

ATHUGASEMDIR

Á aðalfundi Pírata 2015 var bætt við grein 12.1 reglu sem heimilar framkvæmdaráði að halda kosningar á framboðslista ef engin aðildarfélag starfa innan kjördæmis fyrir Alþingiskosningar. Rökstuðningur þeirrar breytingar var að vegna reglna um jöfnunarsæti, sem áskilja að stjórnmalasamtök sem ekki bjóða fram í öllum kjördæmum eigi ekki kost á jöfnunarsætum, er ekki tækt að aðstæður í einu kjördæmi geti orðið til þess að draga gríðarlega úr möguleikum flokksins á að ná kjöri. Sambærileg rök eiga við ef aðildarfélag innan kjördæmis ná einhverra hluta vegna ekki að sinna því hlutverki sínu að sjá um þátttöku flokksins í kosningum til Alþingis. Lagt er til að viðbótin frá síðasta aðalfundi verði gerð að sérstakri grein, og að við þá nýju grein verði bætt setningu sem heimilar framkvæmdaráði einnig að annast kosningu á framboðslista ef hún hefur ekki farið fram þegar mánuður er að lokum framboðsfrests. Vert er að hafa í huga að hér er einungis um að ræða heimild, og í hæsta máta ólíklegt að hún verði nýtt ef aðildarfélag eða kjördæmisráð hafa þegar skipulagt kosningu, þó svo hún fari fram síðar.

Seinni grein þessarar breytingar setur svo ytri mörk á það hve löngu fyrir kosningar hægt er að kjósa á framboðslista. Mögulegt er að túlka greinina á tvo vegu. Annars vegar má skilja hana sem svo að ekki sé heimilt að kosning á framboðslista fari fram fyrr en minna en fjórir mánuðir eru í auglýstan kjördag.

Hins vegar má skilja hana svo að ekki sé heimilt að nota niðurstöður úr framboðslistakosningu sem fram fór meira en fjórum mánuðum fyrir kjördag. Greinin er stuttur, en hefur engu að síður nokkrar afleiðingar. Fyrsta afleiðingin er að ekki er hægt að halda bindandi kosningu á framboðslista nema kjördagur liggi fyrir. Ekkert kemur þó í veg fyrir að framboðslistakosning fari fram. Verði kjördagur síðan auglýstur, og sé innan fjögurra mánaða, er heimilt að byggja framboðslista Pírata á niðurstöðum þeirra. Falli kjördagur hins vegar utan þess ramma er nauðsynlegt að halda framboðslistakosningu að nýju.

Þessi takmörkun er lögð til af tveimur ólíkum ástæðum. Annars vegar er nauðsynlegt að taka tillit til þess að aðstæður geta tekið örum breytingum, og engan veginn er víst að niðurstöður kosninga séu sambærilegar ef langur tími líður á milli, jafnvel þótt frambjóðendur væru hinir sömu. Það er aftur á móti engan veginn tryggt, sérstaklega ekki undir kringumstæðum eins og nú eru, þar sem starf Pírata er enn að víkka gríðarlega út. Það er því mikilvægt að umboð frambjóðenda Pírata sé ekki margra mánaða gamalt, eða jafnvel nálægt árgamalt, þegar til kosninga kemur. Hins vegar verður að líta til þeirrar stöðu sem frambjóðendur hljóta eftir að kosningin er afstaðin, og þess hvaða áhrif það hefur á getu frambjóðenda til að taka þátt. Framboð til Alþingis, hvort sem kosningarnar eru á næstu grösum eða eftir langa hríð, getur haft mikil áhrif á atvinnumöguleika fólks. Það getur skipt miklu um möguleika fólks til að gefa kost á sér hversu lengi það verði opinberlega í stöðu frambjóðanda, og í flestum tilvikum leiðir styttra tímabil til þess að fleiri eiga möguleika á þátttöku.

Ekki liggur fyrir kjördagur fyrir Alþingiskosningar sem forsvarsmenn ríkisstjórnarinnar hafa boðað á árinu 2016. Þrálátur orðrómur er þó um að kosið verði 22. október. Miðað við þær reglur sem hér eru lagðar til, og að sá tími gangi eftir, hefst fjögurra mánaða ramminn 22. júní, tíu dögum eftir afgreiðslu þessarar tillögu. Aðeins eitt kjördæmi, NA, hefur lagt til að hefja framboðslistakosningu fyrr – tveimur dögum fyrr. Jafnvel þar er ekki gert ráð fyrir að kosningu ljúki fyrr en innan rammans. Því verður ekki séð að samþykkt þessarar breytingar setji neinar áætlanir úr skorðum nema til þess komi að ekki verði staðið við gefin loforð um kosningar í haust. Verði ekki staðið við þau loforð er erfitt að sjá að forsendur þeirra áætlana standist að öðru leyti.

7. ÁHRIF STEFNU Á STARF KJÖRINNA FULLTRÚA

TILLAGA TIL BREYTINGA Á LÖGUM PÍRATA (ÁHRIF STEFNU Á STARF KJÖRINNA FULLTRÚA)

1. Gr. 13.1 orðist svo:

Þingmenn Pírata skulu starfa í þágu alls félagsins. Þingmönnum ber ekki aðeins að taka tillit til stefnu heildarfélagsins, heldur einnig til stefnu aðildarfélaga sem málin varða.

Sveitarstjórnarfulltrúar skulu starfa í þágu þess svæðisbundna aðildarfélags sem starfar í sveitarfélagi þeirra. Svæðisbundin aðildarfélög skilgreina með hvaða hætti sveitarstjórnarfulltrúar eiga að taka mið af stefnumálum félagsins. Stefna heildarfélagsins skal aðeins geta talist leggja skyldur á sveitarstjórnarfulltrúa ef engin stefna aðildarfélags fjallar um málefnið.

ATHUGASEMDIR

Í nágildandi grein 13.1 er talað um að þingmenn og sveitarstjórnarfulltrúar séu ábyrgir gagnvart annars vegar félaginu í heild og hins vegar aðildarfélögum sínum. Komið hefur fram að misjafn skilningur er á merkingu þessa, meðal annars í úrskurði úrskurðarnefndar um lagagrein Pírata í Reykjavík um kosningar til Alþingis, nr. 8/2016. Grein 13.1 var sett inn í lög Pírata með fyrstu lagabreytingunni sem fór í gegnum rafræna kosningakerfið, sem lagði upp hlutverk aðildarfélaganna. Í greinargerð með þeirri breytingu segir m.a.: *Gert er ráð fyrir að alþingismenn Pírata muni starfa fyrir flokkinn í heild – það er, fyrir öll aðildarfélög hans. Aðildarfélögum er eftirlátið að skilgreina hlutverk sveitarstjórnarfulltrúa, og bera þeir engar skyldur gagnvart framkvæmdaráði.* Þessari breytingu er ætlað að koma þessum skilningi skýrt inn í texta greinarinnar. Annars vegar er orðalagi greinarinnar breytt þannig að ekki er lengur talað um ábyrgð, heldur er sagt að fulltrúar skuli starfa í þágu félagsins. Hins vegar er bætt við klausu þar sem sérstaklega er tekið fram að þingmönnum beri að taka tillit til stefnu aðildarfélaga sem málin varða. Einnig er bætt við klausu sem tiltekur sérstaklega að ekki skuli líta svo á að stefna heildarfélagsins geti verið talin binda sveitarstjórnarfulltrúa meira en stefna viðkomandi aðildarfélags.

Að baki þessu frekar nákvæma orðalagi er tiltekin sýn á það hvert hlutverk Pírata er á þingi. Með breytingunni er það gert skýrt að þingmenn Pírata eiga ekki að starfa sem þingmenn aðskilinna kjördæma. Þeim er þó engu að síður ekki heldur ætlað að vera aðeins þingmenn landsins í heild, óháð þeim takmörkunum sem mögulega voru á kosningarétti í þeirri framboðslistakosningu þar sem þeir voru valdir á lista. Þess í stað er farið fram á að þingmenn byggji á stefnumálum þeirra aðildarfélaga sem málið varða. Hér er bæði um að ræða svæðisbundnu

aðildarfélögin og aðildarfélög sem byggjast á málefnaflokkum. Markmiðið er að vinna gegn miðstýringunni sem felst í því að hafa eitt Alþingi fyrir allt landið sem tekur allar ákvarðanir, hvort sem þær varða hag landsins alls eða afmarkaðra svæða.

Sérstaklega er vert að nefna að _ekki_ er tekið tillit til þess í þessari breytingartillögu að fyrri útgáfa greinarinnar var túlkuð þannig að óheimilt væri á grunni hennar að takmarka atkvæðisrétt í framboðslistakosningum. Önnur tillaga til breytingar á lögum, sem lögð var fram samhliða þessari, tekur á þeirri túlkun með mun sértækari hætti.

8. LEYFA FLÉTTULISTA

Umræðupráður á Fuglabjarginu um þessa tillögu: [Leyfa fléttulista](#)

TILLAGA TIL BREYTINGA Á LÖGUM PÍRATA (LEYFA FLÉTTULISTA)

1. Við 12.5 bætist ný málsgrein, sem orðast svo:

Þrátt fyrir fyrstu málsgrein skal ábyrgðaraðilum tveggja eða fleiri kjördæma heimilt að halda sameiginlega framboðslistakosningu fyrir kjördæmi sín. Skal þá raðað á framboðslista kjördæmanna þannig að frambjóðendum sameiginlegu kosningarinnar sé dreift á framboðslistana í sem mestu samræmi við úrslit þeirra.

ATHUGASEMDIR

Þessi breyting felur í sér heimild ábyrgðaraðila til að sameinast um eina sameiginlega framboðslistakosningu fyrir tvö eða fleiri kjördæmi. Þá sé raðað á tilsvarendi lista í eins miklu samræmi við niðurstöðu kosningar skv. Schulze-aðferð, eins og er áskilið í fyrstu málsgrein greinarinnar. Til dæmis má taka tvö kjördæmi, þar sem fyrsta sætið á heildarlistanum faru í fyrsta sæti á fyrri listanum, annað sætið í fyrsta sæti á hinum listanum, þriðja sætið í annað sætið á fyrri listanum, fjórða sætið færi í annað sætið á hinum listanum og svo koll af kolli. Þó er það skilið eftir svolítið opið hvernig nákvæmlega eigi að raða niður í sameiginlegri kosningu til að gefa þeim ábyrgðaraðilum sem að kosningunni kæmu svigrúm til að komast að samkomulagi. Ein kosning ákjördæmi, þar sem raðað er alfarið samkvæmt Schulze, verður áfram meginreglan.

9. HEIMILD FRAMKVÆMDARÁÐS TIL AÐ BOÐA AUKA-AÐALFUND

Umræðuþráður á Fuglabjarginu um þessa tillögu: [Heimild framkvæmdaráðs til að boða auka-aðalfund](#)

TILLAGA TIL BREYTINGA Á LÖGUM PÍRATA (BOÐUN AUKA-AÐALFUNDAR)

1. Gr. 4.5 orðist svo:

Á félagsfundi samkvæmt 5. kafla er hægt að leggja fram tillögu um að boða til auka-aðalfundar. Slík tillaga skal koma fram í fundarboði. Sé hún samþykkt á félagsfundinum skal hún sett í kosningu í kosningakerfi Pírata til samþykktar eða synjunar. Sé hún samþykkt með að minnsta kosti 2/3 atkvæða í kosningakerfi Pírata er framkvæmdaráði skylt að boða auka-aðalfund eins fljótt og mögulegt er. Framkvæmdaráð hefur einnig sjálfstæða heimild til að boða til auka-aðalfundar.

Á auka-aðalfundi er ekki skylt að taka á dagskrá alla þá liði sem lög þessi segja fyrir um á aðalfundi. Hafi tillaga um boðun auka-aðalfundar innifalið skilyrði um dagskrá fundarins skal ráðið þó fylgja þeim.

ATHUGASEMDIR

Þessari breytingu er ætlað að gera það að raunhæfum möguleika að boða auka-aðalfund á félaginu. Samkvæmt núverandi orðalagi á greininni hafa eingöngu félagsmenn heimild til að óska eftir auka-aðalfundi þar sem 1/3 hluti félagsmanna þurfa að gera það með skriflegum hætti. Þar sem félagatalið er lokað þá er nær ómögulegt fyrir félagsmenn að uppfylla þessi skilyrði. Þessi breyting felur í sér breytt verklag á þessari heimild félagsmanna, verklag sem gerir félagsmönnum raunverulega kleyft að krefjast auka-aðalfundar. Hér er framkvæmdaráði líka veitt skýr heimild til að boða auka-aðalfund sjálft ef ráðið telur þess þörf.

10. RÁÐNING STARFSMANNA

TILLAGA TIL BREYTINGA Á LÖGUM PÍRATA (RÁÐNING STARFSMANNA)

1. Níundi kafli orðist svo:

- 1. Framkvæmdaráði er heimilt að ráða framkvæmdastjóra fyrir hönd félagsins ef fjárreiður leyfa.*
- 2. Framkvæmdastjóri skal hafa frumkvæði að ráðningu annars starfsfólks félagsins. Endanleg ráðning skal vera háð samþykki framkvæmdaráðs. Sé framkvæmdastjóri ekki starfandi skal framkvæmdaráði heimilt að leggja tillögu fyrir rafrænt kosningakerfi félagsins um að ráðið skuli í aðra stöðu. Starfslýsing stöðunnar skal fylgja tillögunni. Sé tillögunni hafnað er ráðinu óheimilt að skrifa undir ráðningarsamning.*
- 3. Laun framkvæmdastjóra og annars starfsfólks skal ekki vera hærra en þingfararkaup.*
- 4. Með samþykki $\frac{2}{3}$ fundarmanna á almennum félagsfundi skal vísa tillögu um brottvikningu starfsmanns til rafrænna kosninga. Slík tillaga skal koma fram í fundarboði. Aldrei má bera slíka tillögu fram nema að undangenginni tilraun til sáttamiðlunar trúnaðarráðs skv. kafla 8.a.. Trúnaðarráði skal þó heimilt að vísa tillögu um brottrekstur til rafrænnar kosningar án félagsfundar. Sé tillagan samþykkt í kosningakerfinu með meira en $\frac{2}{3}$ hluta atkvæða er framkvæmdastjóra eða framkvæmdaráði skylt að segja viðkomandi starfsmanni upp störfum. Framkvæmdaráði eða framkvæmdastjóra er heimilt að segja starfsfólki upp störfum án aðkomu félagsfundar.*
- 5. Upplýsingar um starfsfólk skulu koma fram á vefsíðu félagsins.*

ATHUGASEMDIR

Í lögum Pírata er eins og stendur einungis heimild fyrir framkvæmdaráð til að ráða framkvæmdastjóra til starfa. Þetta hefur áður valdið nokkrum erfiðleikum. Fyrir síðustu kosningar til Alþingis var þetta leyst með því að ráða framkvæmdastjóra tímabundið. Sá framkvæmdastjóri gekk síðan frá samningum við kosningastjóra og aðra sem gerðu víkjandi verktökusamninga við flokkinn.

Eftir kosningar stóð til að framkvæmdastjórinn yrði ráðinn ótímabundið. Samkvæmt núgildandi lögum er nauðsynlegt að staðfesta slíka ráðningu á félagsfundi. Niðurstaða þess varð að félagsfundur neitaði að staðfesta ráðninguna – en hafnaði henni þó ekki – og óskaði eftir því að staðan yrði auglýst til umsóknar. Afleiðing þess varð að fyrrverandi framkvæmdastjóri sóttist ekki frekar eftir stöðunni. Fram hafa komið áhyggjur af því að þetta fyrirkomulag muni geta valdið vandræðum við ráðningar í framtíðinni.

Hér eru lagðar fram tvær efnislegar breytingar á lögum Pírata til að greiða úr báðum þessum vandamálum. Annars vegar er lagt til að framkvæmdaráði verði heimilað að ráða beint í aðra stöðu en stöðu framkvæmdastjóra, ef enginn slíkur starfar. Hins vegar er lagt til að krafan um staðfestingu félagsfundar á hverri ráðningu fyrir sig verði felld niður, en í stað hennar verði félagsmönnum gert kleift að leggja fram nokkurskonar vantrauststillögu á starfsmenn flokksins.

Sterkar kvaðir eru lagðar á heimild framkvæmdaráðs til að ráða starfsmenn aðra en framkvæmdastjóra. Markmið þeirra er að tryggja að ráðning almennra starfsmanna sé framkvæmd með staðfestingu tveggja aðila. Þannig getur framkvæmdastjóri ekki ráðið starfsmenn án staðfestingar framkvæmdaráðs, og framkvæmdaráð ekki án staðfestingar flokksmanna. Vert er að hafa í huga að framkvæmdaráð þarf ekki að fá staðfestingu fyrir því að ráða tiltekinn einstakling, heldur einungis fyrir því að ráða megi í stöðuna. Þó ekki sé útlit fyrir að þessi heimild verði nýtt í fyrirsjáanlegri framtíð er engu að síður betra að hafa þessi mál á hreinu, ef svipuð staða og verið hefur uppi undanfarin þrjú ár skapast á ný.

Krafa um staðfestingu félagsfundar á ráðningu er einnig felld á brott. Í stað hennar kemur heimild til vantraustsyfirlýsingar á starfsmann. Slíka tillögu þarf að samþykkja með auknum meirihluta á félagsfundi, og fer hún þá áfram í kosningu í kosningakerfinu. Ef tillagan er svo samþykkt þar, með auknum meirihluta atkvæða, er skylt að segja viðkomandi upp störfum. Fer þar að sjálfsögðu eftir ákvæðum samninga og laga um uppsagnarfrest. Að auki eru gerðar sérstakar kröfur til þess að leggja slíka tillögu fyrir félagsfund: Tillagan þarf að koma fram í fundarboði, sem þýðir að efni hennar þarf að koma fram, þó hún sé ekki endilega orðrétt. Þetta þýðir að efnislegar breytingar eru ekki leyfðar á félagsfundinum. Einnig er krafa um að trúnaðarráð hafi tekið mál starfsmannsins fyrir, og leitast við að leysa þann ágreining sem um er að ræða í góðu. Með þessum ráðstöfunum er leitast við að koma í veg fyrir að ráðning starfsfólks geti orðið að vopni í innanflokksátökum á kostnað starfsmanna.

Að lokum er lagt til að grein sem er fyrir löngu orðin ógild verði felld brott úr kaflanum. Það er heimild til félagsdeilda – en félagsdeildir hafa ekki verið í lögum Pírata frá því 2013 – til að ráða starfsfólk til sín tímabundið. Ein fyrsta lagabreyting sem gerð var á lögum Pírata var að setja aðildarfélög í stað félagsdeilda. Engin þörf er á að heimila þeim sérstaklega að ráða starfsfólk, heldur fer einfaldlega að lögum viðkomandi félags um slíkt.

11. HAGSMUNASKRÁNING

TILLAGA TIL BREYTINGA Á LÖGUM PÍRATA (HAGSMUNASKRÁNING)

1. Í stað orðsins „tveimur“ í gr. 4.13 skal koma „einni“.

ATHUGASEMDIR

Greinin fjallar um skil frambjóðenda til framkvæmdaráðs á hagsmunaskráningu. Nú er fresturinn tvær vikur, en þetta ræður í raun framboðsfresti til framkvæmdaráðs. Tvær vikur þykir vera of rúmur tími, og því er lagt til að hann sé stytur í eina viku.